

味璧齋文集

二



味 壁 齋 文 集

(一)

趙 南 星 著

味檠齋文集卷二

奏疏

辭吏部第一疏 以下典銓疏

奏爲懇辭莫大之任。以圖少報聖恩事。今月十三日。該吏部等衙門會推吏部尙書具題。本月十六日。奉聖旨。趙南星改吏部尙書。欽此。臣林居三十年。未嘗一字入京師。見在諸臣。曾爲吏部科道者。多推舉之。亦未嘗一字相通。卽皇考起廢時。翹車滿地。臣閉門學誦。若無關涉。非敢忘國恩也。臣迂愚狹隘。非用世之才。正恐徒取大位。無可以報國恩耳。易曰。負且乘。致寇至。不負不乘。以免於寇。臣之願也。詎意陛下念其先朝舊臣。就列未幾。驟陟崇班。臣勉強從事。分量未滿。氣力已竭矣。今復改爲吏部尙書。此官乃周之所謂冢宰。統百官。均四海者也。臣何人斯。而能統百官。均四海乎。夢寐之中。都無此念。若漫不自揣。徒以其爵高權重。汶汶而居之。則嚮昧之人。而夸毗之徒也。臣雖不肖。恐陷而至此。是以退縮而不敢當也。臣宣布陛下之德意。愍飭綱紀。濯滌汚俗。幸而臺中多賢者。信臣之心。惟欲救民瘼而盡臣節。人人奮起精神。藩臬郡守而下。莫敢欺蔽。從此吏治漸有可觀。民生小康。臣之願畢矣。伏乞聖慈容臣仍守憲職。愈益

努力以期後效。此臣之所爲少報聖恩者也。臣不勝榮幸。

辭吏部第二疏

奏爲再辭重任。以無負聖主之知事。臣不肖。蒙陛下以爲吏部尙書。具疏控辭。奉聖旨。卿公忠正直。品望素孚。統均重任。特茲簡畀。著遵新命。到任受事。不準辭。該部知道。欽此。臣不勝感激。不勝惶恐。公忠正直之道。甚爲難盡。皋襲伊傅之爲臣。不過如此。臣何足以及之。然反是則爲私。爲欺。爲邪。爲枉。四者皆凶德也。臣心膽素小。惟恐得罪於君父。有玷於衣冠。亦不敢爲也。臣之自許。特一鄉黨自好之人耳。豈足爲大。臣哉。遭際聖明。起自田間。以爲御史之長。諸御史之巡方者。將明陛下之威德。墨吏稍稍斂迹。未有澄清之效。陛下求治太切。遂以臣爲無罪。可吏部也。都御史之職。不過考覈諸御史耳。吏部則大小百官。皆所銓序。非至公至明。不足以勝其任。臣之顛愚。不能行私於公。爲近。昔之明於人倫者。率得之天性。非臣之所能也。恐蹈詩人自底之悔。有負陛下迪簡之意。展轉怵惕。不能卽安。伏祈聖慈。察臣之非僞讓。容其辭免。使得竊廉退之譽。以風在位者。臣愚幸甚。

愚臣誤蒙簡任願以全力盡職業疏

奏爲愚臣誤蒙簡任。願以全力盡職業事。臣惟六部尙書。古之六卿。有天下者。所與阜成兆民者也。臣部以用人爲職。四司分任之。其責任甚重大。其政務甚煩劇。而文選視他司尤甚。是以向來該司郎中。住於

署中但於朝房偶見一客而堂官乃獨不然想以承平事少付之所司堂官責大指足矣今強敵內訌窮民稱亂責在用人者部中之事益煩益難臣之衰老夙夜矻矻猶不能辦加之以修廢舉逸官無定員長衢夾巷肩輿闐咽人一日之間精華果銳之氣正在午時以前而鹽櫛未畢客已到門彼往此來踵相隨屬恆至日午始入衙門以昏倦之餘料理公事不亦倒乎臣每見諸臣之少壯者言及此事皆以爲苦吏科都給事中程註之疏亦言今後各衙門非有公事不必紛紛拜謁而舊俗相沿無可奈何臣若亦以無可奈何而違心強行之則必不得盡心於銓政而無多之精力又不足以共周旋人事之用性命之蹶可計日而待也夫人道尙通自無可廢之理但不宜以之妨公事耳臣欲與四司官約每日蚤起卽入衙門至午後公事旣畢退食私寓乃與知交往來似得張弛之宜合於夙夜匪懈之義熟思者一年而不敢擅行萬不得已乃以告之陛下如以爲可則臣與司官共守之庶可以延須臾之命效犬馬之力少分陛下宵旰之憂至於會推之事亦欲蚤起入朝及辰而散以各營其職臣履任之初先言目前之所急如此其他可言者臣必詳察而灼知之乃敢以瀆天聽也臣不勝悚息待命之至

再剖良心責己秉公疏

奏爲再剖良心責己秉公以矯官邪維國運事萬曆十七年臣爲文選司員外郎睹士習之不端慨民生之日蹙上剖露良心一疏言大小臣工之干進及守令之害等事於在位者多所譏切爲科臣所叅蒙皇

祖優容之請告歸田二十一年起爲考功司郎中以管察得罪去蒙陛下復起之洊至今官向時天下方太平臣之言似爲私憂過計然大小臣工不能以其干進之精神用之修職因循苟且以至今日士風大壞吏治隨之而民愁苦民愁苦而外敵乘之內侵外敵內侵而愁苦之極因而作亂天下之太平去矣此前臣之罪而今臣之責也今臣復不能改則天下之亂當不止此奈陛下之社稷何臣老矣幸而良心尙在所爲竭智力於陛下者不過與大小臣工各以其良心爲社稷蒼生而已今科道諸臣之條陳銓政者大都皆言干進之害欲獎退而抑競然其良心爲富貴所汨沒皆以干進爲當然若臣先無良心干之則力爲推轂不干則任其淹滯誰獎之而誰抑之乎夫良心者何惻隱羞惡辭讓是非是也孟子所謂四端從仁義禮智而發者也士大夫有惻隱之心則必不忍害人矣有羞惡之心則必無賤辱妄苟之行矣有辭讓之心則必不受其所不臧矣有是非之心則必不以私意亂白黑矣夫如是而後可以爲人故曰人之有是四端也猶其有是四體也假令乘軒服冕而四體殘廢則不若其四體完好而貧賤之爲愈也而舉世莫之寤也寤乃可與言忠孝道名節耳夫天下之行私最便而得利最厚者莫過於吏部臣亦人也豈無鄉里親友門生豈無私心然而不敢行也何也臣之行私必與司官言之外人未有不知者知則近者干之以顏面而不敢不從遠者干之以書帕殊爲不雅况又不能成其私譬之庖人擇其柔嘉肥濃而

豈無好賢之心哉。然見今之薦人者已多。無庸復贅。亦恐干之者衆。而及於匪人。是以雖平生所傾服者。未敢薦一人。亦不敢爲人求薦。臣之所以保全其良心者。亦甚苦矣。今內之薦人者。講陞者。講調者。與夫外之咨陞者。調繁者。保留者。腹裏而作邊俸者。何其不憚煩。不避嫌也。想其初指。本出於好賢。而未之深思。門開不可復閉。其苦猶之臣也。各相體悉而不行爲便。今陛下之小民。皆在水火之中。而居官者皆欲得京堂。薦賢者皆欲其爲京堂。甫爲京堂。卽欲爲巡撫。甫爲巡撫。卽欲爲卿貳。若絕無救民之意者。可以救民者。莫過於巡撫。而此官甚不易作。必德望威稜。能使貪污解綬而後可耳。其次則知府最急。知府賢則州縣官不敢害民。二者官有大小。皆宜選擇。破格而用之。久任而優擢之者也。近聞多從人討而得之。何怪乎謁選者以討缺爲常也。語曰。意苟善。雖不智可以爲長。夫旣已爲長。則宜以長待之。若人人以其智求多。則一事不可行。唯大意無害。則從之而忘其小缺。此人羣之所以相安也。天下之最可患者。莫甚於民之作亂。今幸而稍定。尙可不爲之防乎。臣以爲防之。自知州知縣始。蓋民之將亂。必擷徒成黨。繇三五而百十而千萬。夜聚曉散。非一日也。鄰里必知之。衙役必知之。而有司不知。與鸛鷖何異。及其亂也。乃聞之上官。爲之興兵動衆。以屠戮之。旣平而論功升賞。守土者爲最。孔子曰。虎兕出於柙。是誰之過。與。今出柙無過。以與衆逐之爲功。則孔子之論刻矣。謂宜有司以民亂聞者。新任則追論前官。任及一年者。則令之戴罪捕賊。庶能防亂於未作乎。然莫急於懲貪。今有司之貪。固已成風。而長安書帕。自十二金而至

一百有至二百封者。此皆從何而來。安得不貪。貪則多酷。既腹其脂膏。又加之毒痛。民安得不亂。如是而但論罷之。如行商而得素封。有歌舞而歸耳。謂宜以後穢迹昭彰者。撫按先行究問確實。而後具奏追贓。以抵兵餉而減加派。如有聽囑受賄。曲爲庇護者。容臣叅奏重處。庶貪風漸息。而亂萌可消矣。故曰。國家之敗。繇官邪也。官之失德。寵賂章也。臣旣以之自責矣。司官所與共用人者也。臣欲遇各省直司官之缺。發單於其省直之卿寺科道。及吏科河南道掌印官。令舉其才品堪任者數員。請旨點用。務極一時之選。至於掣籤之法。自上古以至我朝所未有。自萬厯年間始用之。以示公。其初卽不能行。遂有造籤之法。討缺者無不如意。御史翟學程之疏。至以爲可笑。良亦無怪其然。荀卿曰。探籌投鉤。所以爲公。上好曲私。則百吏乘是而後偏。此假設以見行法之在人也。而不意天下之果有此事也。似宜更之。以復祖宗之舊。臣必不敢徇私。司官無不相信。卽有徇私者。亦以不能率屬治臣之罪。必無所怨。夫人雖爲善。必得天之心。而後利有攸往。陛下猶天也。伏願鑒臣之朴忠。事之不可行者。必不敢望陛下行之。人之不可用者。必不敢望陛下用之。可行可用。而狗馬之誠。不足以動天心。煩瀆則恐得罪。默而息焉。則衆皆責備之。以爲持位保祿。無面目以立百僚之上。伏惟聖慈察之。採擇其中。臣遵奉施行。幸甚幸甚。

議裁代歷濫糧疏

題爲議裁代歷濫糧監生。以清姦弊。以肅部體事。文選清吏司案呈。照得祖制監生歷事之設。以其繇成

均教成分撥部寺。使之歷覽曹規。嫻習吏事。升堂而磬折。執役則矜嚴。所以豫儲其民社之品而優之也。故在聖祖時。有不拘之資格。有不次之遷除。豈非以其觀型親切。摩礪老成。而致然哉。若今之所謂歷事監生。則何其不然也。自國子監咨送到部。當圖撥時。十已亡二三矣。及分歷各衙門。并十亦無一也。公座走班。覲音杳然。督之不來。罰之不懼。其一二或至者。率皆僣情頂替。優孟叔敖。猿猴而衣冠者也。初猶別衙門。或然而今本部亦然。其辱部堂甚矣。又焉用此。而且冒支祿米。以國家作養之資。實姦黨谿壑之腹。此而不覈。長此安窮。今議頓清積弊。則請令國子監監滿各生。仍照兩月一次。督送名數入部。盡將正歷粟監。類送戶工二部。每名依例納銀。納訖給文赴部。以憑上選。至雜歷寫本清黃等款。所從來久。難以遽裁。當量每番人數多寡。分送各衙門。但既係納銀。無人食糧。各衙門不用開造。如此。則歲可得萬餘金。省米亦數千石。彼既樂輸。此復剔蠹。於貲郎固不失本色。於部寺亦無損大體。至於舉人歲選。恩貢。合無仍令親歷各衙門。以無廢舊制。勤者開糧。曠則弗予。必歷滿而後赴選。無徇顏面可耳。查得歷事監生。國初止有正歷。其雜歷因各衙門奏討而設也。則正歷應多。雜歷應少。派撥繇國子監。原有定額。第恐此法一行。游移百出。人將憚正歷之實輸。而趨雜歷之詭匿。則又藪姦矣。合無移會國子監。撥送部堂之日。派定正歷若干。雜歷若干名。使猾者不得趨避其間。庶國體部規。爲兩得之。相應呈請定奪施行等因。案呈到部。臣等自履任以來。未嘗見一監生。昨十六日圖撥數百名。鄉黨熟識者。皆係替身。卽替身到者。六十一

名耳。旣而聞有一人而代數人出而復入者。替身亦未全到也。不得已照衙門分撥。則替身皆到。包攬食糧。臣等相與歎息。法紀之壞至此。殆不可收拾矣。正歷納銀。本非祖制。但政繇俗革。通則可久。且比來海宇多兵荒之虞。諸生同內顧之憂。其打點雇覓。亦有不得已者。雜歷旣可納銀。正歷何爲不可。據議所以體諸生之情。祛吏胥之弊。於銓政不無小補。伏乞聖明裁擇。勅下戶工二部。酌議施行。

朝覲合行事宜疏

題爲朝覲事。考功清吏司案呈。照得天啓三年正月初一日。天下諸司官員。又該朝覲之期。所有合行事宜。例應預行知會。案呈到部。臣等竊惟治天下之道一言耳。安民是也。人主行之。則國家安。人臣行之。則身名美。此甚易知。甚易行也。古之帝王。視民如赤子。建立公卿大夫百執事。以煦嫗揜撫之。而猶恐在外之臣。有不能奉行德意者。乃屈萬乘之尊。三年一巡狩。問其能安民與否。而黜陟之。巡狩之後。羣牧四朝。又奏言而明試之。其視小民若此之重也。淳古旣遠。巡狩之事。不可行矣。今之朝覲。則四朝之遺意也。我國家於腹邊地方。各設巡撫。巡按。言其代天子巡行。以安小民也。然必布按司道府州縣官。皆能潔己愛民。而後小民得安。而府州縣官尤爲親民。布按司道官主察府州縣官之治狀。以報之撫按。而達之部院。以俟黜陟者也。昨者萬壽聖節。各處司道進表官至。例有報部賢否冊。堆積如山。臣等取其一二觀之。大小甲科之官。皆大賢也。鄉貢之官。間有疵議。其卑冗小吏。乃多劣考耳。臣等以爲此冊。作之則抽黃對白。

徒事雕蟲。造之則汗牛充棟。祇堪覆瓿。吏治之虛僞如此。小民何繇得安。今甲科之塗極重。起家甲科者。尊卑長幼。皆同袍也。而其中又有鄉里親戚。門生故吏。通家朋好。雖知其貪酷。皆不肯言。而鄉貢之官。則又有弱顏媚態。巧立於呈身。如飛鳥之依人者。則不肯言。而又有狙上官之好而投之。無不得其歡心者。則不肯言。而又有權豪之所囑託。則不敢言。而又有不藉他人。其機術鋒俠。足以起風濤。成鬪變者。則不敢言。是知縣而上。至於司道。莫非循良卓異。其爲不肖者甚少。以此而蒙蔽撫按。坐之濃雲厚霧之中。惟其言是聽。非惟蒙蔽。而又把持之。其所舉刺。非其所報者。不敢用一人。是齊心以害小民也。小民不安。則禍亂起而國家不安。是齊心以害國家也。夫臣子受聖上之恩。而齊心以害國家。率緣士風之壞。知有富貴。而不知有忠孝。以至於此。今小民已塗炭矣。國家已机隍矣。明年大計。若復彼此數同。沿襲故套。所糾劾以備考察者。皆卑微之官。孤寒之士。愚拙之人。而大貪大酷。皆得漏網。考察往返。爲小民之煩費甚芒。而毫髮無益於民。安用考察爲也。臣等必不敢鈔謄塞責。廣詢細訪。果有真見。卽行斥降。事完通查開報之失實者。叅奏處分。伏維皇上加意窮民。貪吏追賊之令。不啻再三。而臣下莫肯奉行。此臣等之罪也。臣等卽不自徇私。而任他人之徇私。不敢執法。以市恩而保位。此鄉愿之行。而巧宦之精者也。聽科道官糾劾。以爲不忠之戒。其他應行應革事宜。歷年通行。臣等益加愆飭。相應題請。合無恭候命下。本部照例填給勘合。順付公差人員。齎去兩直隸十三省布按司府等衙門知會。并移咨各該巡撫都御史。及咨都察

院轉行各該巡按御史一體遵照施行。未敢擅便開坐。謹題請旨。一士人之不貪。猶平民之不盜也。僅可爲人。非奇節也。今士人一爲有司。往往不期月而致富。問其所以。率繇條鞭法行。錢糧經有司之手。重收而取羨餘。加派在其中矣。而數年來。又以軍興加派。則加重收而取羨餘。是加派無已也。有司之貪如此。民安得不爲盜。小盜起而大盜隨之。皆有司爲之竿也。而又以勦戮爲邊功。幾於無人心矣。今次考察。不必舉卓異。以開鑽刺之門。惟照先年舉廉吏之法而精之。每省卽一二人不爲少。臣等體訪真的。紀錄以待異擢。一各正官入覲。印務須委官署掌。諺云。署印如打劫。此語似爲太過。今則成真實語矣。始而慮州縣佐貳之貪也。而易之以教官。教官猶佐貳也。則又易之以府佐。府佐亦未必皆廉。且印多人少。於是上官無術。而下民無命矣。計惟慎擇其人。但令看守倉庫。不許徵收錢糧。接受詞狀。各處張貼告示。不許小民交納投遞。入覲官事完之日。臣部嚴限。令其赴任。違限者。撫按官叅奏議處。一從來入覲之年。皆禁書帕。而書帕日多。其未入覲之先。固已絡繹不絕矣。而都門相見。尤爲必不可廢者。古言人道通。功勳成。交際者。人道之所以通也。匏葉可以成禮。木桃可以抒情。今則豐縟精巧。以結權貴。是賄賂。非交際也。與者。受者。皆縉紳士大夫。國家之賢才。至煩明旨嚴禁。則亦不可以爲士大夫矣。此臣等所不忍言也。若猶有如何日之爲者。倘一敗露。則亦不敢以含咽爲長厚也。

重地需人不宜議裁疏

題爲重地需人甚急。督撫不宜議裁。懇乞聖明。急敕廷議。仍簡才望之臣。以資彈壓。以奠封疆事。該吏科都給事中程註。以薊遼總督聞憂當去。臣等方議推補。而樞輔孫承宗疏至。爲詳酌督撫事宜。以復成法。以一政柄事。是日遂止不推。及偏沅總督楊述中。已經予告。或欲裁去總督。或以貴州苦於無餉。欲另設按臣。專管督餉。或欲於貴州按臣。加一勅書。兼督川湖之餉。具題奉旨。下部院會議。臣等查得會典。先年薊遼有警。間遣重臣巡視。或稱提督。及嘉靖二十九年。始改爲總督。薊州保定遼東軍務。鎮巡以下。悉聽節制。至三十三年。移駐密雲。而巡撫駐薊州。防秋則駐昌平。是薊遼總督。原爲邊患而設。今邊患方殷。自無可裁之理。卽樞輔之疏。亦非以爲可裁也。其疏不曰皇上必不欲臣離關。則請且不推。經略總督。只以臣一人督兩撫臣乎。又不曰往日經撫以議論紛紜。致失疆土乎。此其意可知也。當遼左淪陷之時。在位者人人顫恐。爲保妻子之計。樞輔不勝勁忿。自請行邊。此其忠義激烈。一日而感於神明。聞於天下。祖宗在天之靈。無不欣喜。假令祖宗朝一聞警報。輔臣有自請行邊者。則必不設總督矣。夫總督之設。爲節制鎮巡以下也。政府之柄。豈不更重也哉。然則薊遼總督。在往日則不可裁。在今日則不可推。此事之無可疑者也。榆關之事。皇上得樞輔而委任。三二年來。邊疆安輯。其效可觀矣。今舊督臣以制歸樞輔。實兼將相之任。弭節移駐。及巡撫所宜居。一切撫賞防勦。惟相其機宜而行之。以俟全遼恢復。奏凱還朝之日。乃議設總督。似無不可者。至於偏沅總督。合楚滇黔三省之兵餉而兼理之。不見於會典。惟萬厯年間。征反

播會。乃有撫臣。事甯旋止。正如總督之設。以貴州用兵之故也。科臣謂偏沅一帶土司。環伺而待命。兼以數百里獷悍之苗。非設一撫臣。不足以彈壓之。此亦不易之論。但貴州之軍士。枵腹而荷戈。待餉甚急。撫臣之設。談非容易。不若選擇風力臺臣。奉勅過往。專管督餉。以救百萬生靈之命。非小任也。餉足而後兵強。乃可以卻敵。非小功也。於計似便。均祈聖明裁定。如以爲可。勅下樞輔。一意安攘。督撫可且不推。偏沅巡撫。容臣等慎擇推舉。督餉按臣。都察院遴選而用之。盪平之日。卽初差者。亦照近題事例。卽轉京堂。以勸忠勤。

舉用名德舊臣以光聖德疏

奏爲舉用名德舊臣。以重廷推。以光聖德事。昔周公之諫成王。曰。無遺壽者。壽者者。舊臣也。嘗效忠於先王者也。是時成王蚤登大寶。意者喜新進而遺老成乎。此亦人情之常。是以周公戒之如此。我皇上圖任舊人。卽位以來。求之如不及。厯眉皓髮。多列崇班。皇上之心。卽堯舜之心。超絕常情。億萬矣。頃者南京吏部尙書。北京戶部侍郎等官缺。臣等會同九卿科道。廷推原任都察院左都御史鄒元標。鄭三俊等。三俊等皆蒙欽點。惟元標未下。元標者。以皇祖五年成進士。刑部觀政。卽論劾專權奪情之大臣。而廷杖遣戍者也。皇祖起之。而未竟其用。皇上擢爲總憲。以講學被小言而去。舉朝皆望其來。臣等與諸臣共推之。未能卽得俞旨。以皇上知人之明。同於日月。豈猶有疑於元標之宜推乎。夫元標釋褐之始。卽捐軀以爲國。

家其忠孝宜推也。俸祿之外。囊無一錢。書帕不敢入門。其廉潔宜推也。可仕若挾其山林。可止卽忘其軒冕。其謙退宜推也。夫忠孝也。廉潔也。謙退也。皆今人之所不足也。元標用而士類有所矜式。其裨益朝美多矣。元標之講學。豈迂也哉。今之人正苦不迂耳。求美官則腐至。見危事則兔脫。不迂故也。今之義類。未有不以元標爲可推者也。夫人臣不遇堯舜。則無望耳。遇堯舜。則望之無已。萬幾之中。有一事之未盡善。則不敢不爭也。一事之中。有一毫之未盡善。則不敢不爭也。以元標之忠賢。皇上猶不卽用。則是捐軀報國者。不足信也。以廷推而不卽用。則是舉朝皆不足信也。無乃非堯舜疇咨急賢之意乎。臣等知至愚不肖。何足見信於皇上。然職在用人。殊無以施面目。日夜狂惑。不能處心。若皇上以所推不當。則甯治臣等之罪。而不敢垂頭塞耳。爲海內之君子所譏讓。倘蒙皇上沛然易吁。嘯爲都兪。使千官抃舞。臣等不勝仰天叩祝。

衰遲宜去疏

奏爲衰遲宜去。仰祈聖慈允放。以全恩禮事。臣聞聖王井田之時。野人六十而還田。爲其不可以力耕也。卿大夫七十而致仕。爲其不可以趨事也。又曰。七十老而傳。言以家事傳之子孫也。夫家事且不能辦。而況於國事乎。臣今年七十有五歲矣。無論行能卑陋。不足以當統均之任。數年來脾胃日弱。不食而飽。強食則病。所苦非一。雖勉強效職。曠廢甚多。且知人而後能用人。博訪而後能知人。臣公事甫畢。卽困頓而

歸私寓恆不見客。客來亦不能往。世豈有居山濤之位而習嵇康之懶者。臣之病舉朝知之矣。延醫傳懋光等治之。亦覺有效。稍稍勞苦則病。夜則穩臥。晝則病。乃知臣老矣。非病也。臣有外孫柏鄉縣諸生張庸周。二十餘而通五經。抗志希古。可爲他日之才。臣比聞其夭折。不勝悲愴。臣於是乎益老矣。夫病可以藥艾而愈也。老則無復壯之期。臣遭際聖明。起自荒野。驟躋上爵。壽至七十五。豈有遺恨。第恐旦夕不可知。皇上至仁之心。未免惻然動念耳。臣受皇上天高地厚之恩。欲盡力以報萬分之一。而無力可盡。求去萬非得已。懸車已晚。未足以爲澹退。誠欲及視息之猶存。匍匐一望闕廷。叩首而去。伏祈聖明鑒臣之愚。一字不欺。垂慈允放。不俟屢疏。臣退有餘榮。感且不朽矣。

敬陳銓政無辱部體疏

奏爲敬陳銓政變通之宜。以漸復祖制。無辱部體事。臣等入部以來。見科道官條陳多詆訛司官者。而科臣熊奮渭、臺臣李喬崙皆言文選考功司郎中宜不拘資序。探望而久任之。正與臣等之意合。然猶未及於司官之無人也。夫千金之家。必有紀綱之僕。令之招選羣僕。以分辨護之任。而後家政克修。羣僕不備。則必有所缺。若有其人而呼之不應。畏火伴而不畏家長。則紀綱亦虛設耳。其家鮮有不敗者。臣等不肖。蒙皇上以爲吏部。此周之所謂冢宰者也。每誦周官之言曰。統百官。均四海。不待循省。而汗浹然沾背矣。誠自知其闇劣不勝任。况外察伊邇。當此危亂之時。用人更急。欲得衆賢爲屬以助之。而四司官額設十

五人今僅有八人。惟稽勳有見郎中驗封考功者。皆從家中起之而未至。文選以員外署之。而三司俱無員外。惟主事不缺。皆新進而令之代庖。卽代庖亦數更易。遷轉太驟。而事多廢弛。臣等雖有盡忠之志。而不能自行。昔時司官。每省直恆二三人。每一人自主事而員外而郎中。皆徧歷四司。恆再請告。在署者欲請告。則預招在籍者來。不待起補。彼入則此出。是以恆無缺人。大率十年而後得爲郎中。文選考功郎中。事任尤重。不可暫缺。偶乏人。則從他部調之。陸光祖、鄭汝璧等是也。近年出署者。皆薦人自代。展轉相引。議者遂謂其有頂首之銀。是以臣等每遇員缺。發單咨訪。所以爲諸臣絕疑謗之端也。而舊者人日以多。資日以深。若循資而起用之。則遠者難以遽至。是道隔而望三危之露也。故必擇其道里之近者補之。尙不足以滿多缺。而猶慮其拘於循資之說。曰。某某在吾前也。雖奉旨點用。而埋根不進。是君命召不俟駕之禮。第爲資深者而設也。其勢必至起補於數千里之外。以掌選。而經年代庖。考察期迫。馬上催促。管察者來。而苟且完事。如科臣之所言者。是以臣等不得已而就近推補。命下卽時就道。依限而至。其遠而不能待者。亦就近調補。不妨一處二人。待遠者已至。而後以一人避之可耳。先年呂坤、黃克念、皆甯陵人。而同時。司汝霖、傅作雨、皆江陵人。而同時。此臣南星之所親見也。行之此道。旬月之內。而四司俱滿矣。文選郎必管六選。而後內轉。考功郎一年而內轉。不必管選。如一年已及。而遇考察。則察完而後轉。以見爲銓曹者。競於職業。而淡於榮進也。然司官殊亦難作。典選尤難。人人皆欲美官。皆欲速化。旣自求之。又爲其

親戚故舊求之。或非親非故。而有所求之。皆求之典選者。典選者一人耳。不能盡如多人之意。但以一二語譙詆之。而杜門求去矣。臣等慎簡司官。與之同心奉公。如有以陞除相託者。一一與臣等斟酌之。如振拔淹滯。昭洒冤抑。正臣等之所樂從者。如畏勢徇私。卽行叅處。或以任怨招尤。卽爲查明留用。必不聽其引避。如張鳳翔。而舍一賢司官也。臣等見御史劉四端。叅尙寶司司丞黃正賓之當知止。而曰今推尙寶司少卿矣。蓋臣部擬推正賓以少卿。緣大選急選之煩。未暇上疏也。夫正賓雖起於貲郎。然曾建言國本。廷杖爲民。以恩詔起用。雖被指摘。皇上言其有功而徑留之。此亦人臣之異數也。豈概施於貲郎小臣哉。夫有功者。有功於皇考也。臣捫心自思。人有效力於人之祖父者。自不能忘。况以皇上之大孝乎。夫任子者。其先未必皆有功於國家也。負牀而卽有官。往往至藩臬。豈必成進士。人臣捐軀以爲君父。其功大非有大罪。必不可棄也。正賓之推少卿。本臣南星之意。恐外人不知。而以之詬訛司官。不敢不爲一言。司官陞調之事。臣等所得自行。而俗情之蔽錮已深。所謂畏火伴而不畏家長者也。輒復瀾瀾聖明。求得嚴旨。亦足以明臣等之不肖矣。至於黃正賓之推。如聖意以爲可。臣必不敢因人言而變其初念也。均乞採擇施行。

革乞恩空選恤困窮疏

奏爲革乞恩空選。以祛姦弊。恤困窮事。臣等每當大選之期。聽選諸人。紛紛控訴。皆言本以久次入京。謂

當卽選而守候益久上首之人益多衣食乏絕恐一官終不可得而爲異鄉之鬼悲泣嗚咽不忍見聞其人大抵皆吏員也流品猥雜巧猾多有臣等愚暗既不能燭其隱微之弊乃併其公然壞法顯然亂政者而不敢問則負皇上之任使太甚矣我國家科貢外置吏員一途按臣部職掌納銀充吏必考其文義行移書劄三事俱可取者爲一等二事可取者爲二等且一考不已又再考外考不已又京考御史考不已又部堂考其間考不中者猶有降叅黜退卽中者又叅充撥辦日積月累必候三考役滿然後題給冠帶蓋冠帶若斯之難也至冠帶後又官辦半年回籍又省祭十五六年或二十年到京又守部半年或一年過期者又有壓選覆考時又分別考中不中日積月累必俟各項俱滿然後取次除選蓋除選若斯之難也豈非以其人衆而弊多故隘其塗而泥其進以防濫觴哉迨事例既開銓政已壞矣乃今又鑿空出乞恩一例而祖宗立法之意蕩然無餘矣初吏典有隨軍隨工隨邊事完而各衙門輒與具奏以減免其當該省祭官辦考試者後遂有非軍非工非邊而駕言三事者因又有軍工邊外稱勞者因又有非吏非典而竟登其親知使令之白丁走卒者因又有不奏而移咨臣部者總名之曰乞恩不知此恩向誰而乞豈朝廷之官可爲臣子之私恩耶且乞恩之職又偏得丞簿夫丞簿者朝廷之八九品官也如實歷則吏員正八省祭考中者始得丞吏員正九省祭考中者始得簿卽援例亦納銀八百七十兩者始得丞納銀七百七十兩者始得簿今既不實歷又不援納朝而白丁夕而品官賣爵已爲稅政而乞恩則爲怪事矣至

於官有定行。行有定序。前後既定。擡越何從。乃今又有空選一例。納銀於庫。取選於部。不論年月。不論上下。首一有庫收。即可得官。於是後者既空。而前。前者遂壓而後。已壓又空。再空又壓。貧者何日出頭。次序一淆。吏弊百出。而選法益不可問矣。夫吏員無怪耳。乃明經正途。亦有空者。此其人理都盡。而可使之立於民上哉。總之事例行。則實歷三考。滯乞恩行。則援納與實歷併滯。空年行。則收卯出序者亦滯。此貧窮拙守者。所以叩胸而泣血也。臣等請自今冠帶除選。俱用舊法。乞恩空選者。一概停止。若夫已空之官。每行每選十名。搭選二名。漸次銷除。其明經空選者。不得選爲正官。夫停止乞恩。不必再計。理財者卽患貧。何至有空選之例。夫各吏上糧。不問行頭。而概齊以三十兩。非戶工例乎。各吏本行。俱二等雜職。候選倉巡。而州典上糧。則後九矣。州司上糧。則正九矣。府司上糧。則從八矣。道司上糧。則正八矣。以無品之倉巡。視有品之丞簿。不啻天淵。何止以三十兩銀。遂令拾級而上也。且納免轉考。俱準上糧。假令歷役三年者。納免之費。不過四十金。以三十金準上糧。而三年之歷役。乃止以十金免可乎。何不納免自納免。上糧自上糧。而上糧之銀數。定照品級爲多寡。夫然後以上糧之所加。抵空年之所減。無損戶工之庫藏。而不壞臣部之選法。倘亦可乎。夫自遼左用兵以來。司計者所爲籠括之術。至空選而極矣。臣等以爲不若追貪官之賊爲便。今世道衰頹。士風濁穢。貪官甚多。有一人而賊至十數萬者。何不追之以助軍餉。民貧徹骨。

之四德。利在其中。以義卽爲利也。義莫大於懲貪。而可以安民易俗。何利如之。故臣等以爲便。伏乞聖明留神覽察。敕下戶工二部。停止空年之例。敕下各衙門。勿以乞恩咨送。臣部幸甚。

典銓不能用人疏

奏爲典銓不能用人。控籲苦心。仰祈聖鑒事。臣於二月初十日。以衰遲求去。次日。卽蒙聖旨溫留。臣卽勉出謝恩視事。臣受皇上之厚恩。何敢言去。所以求去者。誠見此時中外皆亂。而人情邪險。雅道幾絕。居官者欲周人情。必毀官方。况吏部乃皇上所使貴人富人。處必爭之地者乎。今吏部四司。惟有主事而無郎中員外。目前之求官者。紛至沓來。如鄧林鳴蟬。不可勝聽。而轉盼卽爲大計之期。是非混淆。大費心力。文選考功司郎中。豈容久缺。豈易勝任。臣欲破格用人。以救然眉之急。而自惟望輕。恐不足以服羣情。不得已於二月二十日。上疏言四司官陞調推補等事。恐不能至。欲就近推補。不妨一處二人。待遠者至。乃以其一避之。節奉聖旨。覽奏。司官陞調推補等事。有裨銓政。且係舊制。卿自酌行。其任事賈怨。致被挾私指摘的。從公主持。毋聽引避。欽此。臣此疏思之三月而後上。良亦苦矣。今因職方司郎中鄒維連之調。稽勳司。臣乃自知望輕。果不足以服羣情也。臣三十年前之司官也。其時司官皆堂上官所自選。無咨訪之說。蓋朝廷所用爲吏部者。必以其公方能用人也。三事九列。皆聽其推舉。豈其司官十數人。而不能自選乎。厥後政柄下移。陞轉請告者。皆引下首。所引又未必得人。屢被彈劾。而外人遂謂其用頂首之金矣。科臣阮大

鍼曾與臣書曰。吏部有祕藏陰符經。言頂首也。臣甚恥之。是以入部卽上疏言。司官有缺。咨訪於其鄉之京堂科道。而以吏科河南道非其鄉。示大公。以免頂首之議。非得已也。臣爲總憲時。與鄭三俊同僚。一日問以部屬之賢者。三俊首舉鄒維連。曰。風節學識。種種超人。臣素信三俊。不復問他人。而他人之稱維連者甚多。又見其叅妖道宋明時疏。臣益信其賢。遂不謀於人而用之。今主事吳羽文再求去。曰。江西不宜有二人。鄒維連亦求去。曰。有羽文矣。而又聞有從臾維連去者。曰。是不繇咨訪。夫一處不妨二人。臣所親見。前疏已言之矣。司官咨訪。惟主事至知縣而止耳。然則他部之郎中員外。無一可吏部者乎。有如維連之賢。臣徒羨之。而以非繇咨訪不敢用。是郎中員外。皆入咨訪而後可也。臣前疏所引陸光祖。鄭汝璧等。皆他部郎中也。此外又有穆文熙。蔣時馨等。以尙寶司丞調。皆當增入而後可。亦不勝其瑣屑矣。間一調補庶賢。無不舉。官無久曠。舊制之善者也。想舉行之初。意在進賢。或亦未必先奏聞而後啓事。聖主不以爲專擅。况旣已奏聞。而猶欲一一關白。聽其頤指乎。當此部事恩迫。司官寥落之時。遠而賢者旣不能待。近者又不許用。臣如失左右手。已成廢物。安能報聖恩乎。夫鄒維連者。臣奉旨酌用者也。而不得用。又使二臣皆求去。此以後甯能復用一人哉。臣不知昔之調部者。一處二人者。何以外人無議。僚友相安。至臣而二臣皆欲引避。不敢就列。此臣之望輕所致。欲以何尤。但以臣之望輕。而使臣下視明旨爲不必遵。

以去矣。如皇上不欲臣去，臣請竭力於進賢退不肖，以行其良心。他省有孤清介特，不求人知者，卽拔舉之，必不敢隨人穿鼻也。至於鄒維連、吳羽文，皆賢者，不知何故求去，意者以臣老耄不足與有爲耶？抑別有所畏耶？其應否遵旨到任理事，臣不敢擅擬，伏候敕下施行。臣不勝惶恐之至。

催補官員疏

題爲奉旨催補官員事。文選清吏司案呈：先奉本部送吏科鈔出南京山東道監察御史涂世葉題稱：「史記事李炳恭、丁元薦、賀煊起用事情，已經奉旨。吏部酌議來說，查得此四臣者，先經臺省論薦甚多，其曰在官而建白風生，作令而才名彪起，獨立不懼，而決志遂甘，肥遯持論偶左，而爲郎綽有清操。雖人多偏鋒，才各別具，正不妨取長於短，愈以見瑕不掩瑜。其言甚公，甚確。部覆已奉俞旨填補，而聖意猶遲疑未決。此古聖帝明王慎重用人之意也。臣等反覆思之，我朝二百五十餘年，節次大典，自非喪心病狂，誰敢擅破此例？自非其人果賢，誰肯冒不韙之名而輕舉？以自壞其官。臣等職司銓敍，平生直諒之友，近者面言遠者貽書，皆以不能用記事等爲臣等之罪。記事等一日不起，則人心一日不服。臣等一日不能安其位，建言者之瑣瀆聖明，必不可禁。臣等日夜念此，腹中輪轉久矣。乃敢補牘上請，合無如本部原擬，或行人司副，或在京閒散，以完前局，而更有請者，原任刑部郎中後陞汀洲府知府沈應奎，精忠貫日，勁節凌霜，不在四臣之下。臣等知之甚深，不敢當蔽賢之罪，輒併舉之。或補外吏，以需優轉，伏祈勅下。臣等遵奉

施行。

議增司屬疏

奏爲議增司屬。以便拔賢報國事。臣等竊聞聖人作易。以開物成務。易者。變易也。道本不易。而天下之事。有時而窮。窮則變。變則通。通則久。是變易乃所以成其不易也。不窮而變。是謂亂常。誰能容之。我朝稽古建官。吏部爲用人之官。四司官止十五人。可謂少矣。又分直分省。皆有定額。似非立賢無方之義。蓋用人重柄也。而吏曹美官也。重柄而多人操之。則亂。美官而無定額。則巧健者偏得之矣。祖制之善如此。承平既久。駸以廢壞。至於今日。缺者殆半。經年不補。有新進而無舊人。有代庖而無當俎。此亦可謂窮矣。臣等酌時宜。循往事。上疏請於皇上。起在籍之近者。不拘資序。其部司郎中等官。有賢聲茂著。臣等之所必不能舍者。間一調之。或一處二人。以爲目前蛩蟻之助。非謂可以常行也。業已奉聖旨矣。而見在者求去。判不肯留。臣等一念拔賢之心。乃豪逐賢之疑。良亦甚苦矣。人之情固駭於其所乍見。駭則生疑。疑則滋口語。而興鬪變。故駭俗而喻之。不若其勿駭也。然心本爲國。何敢以外而妨內。日來回環深念。吏部四司主事。惟稽勳司一人。餘皆二人。想以稽勳事少之故。然今日之稽勳。皆儲之以爲文選考功者也。臣等欲於稽勳司增一主事。在各省直咨訪定額之外。官不必備。以待一時缺人。臣等所真知其賢而必不能舍者。不時推補。則一處而偶二人。不復可疑。而臣等緇衣之好。亦得以少伸矣。郎署小臣。俸祿不多。而於以用。

人甚便行之既久恐巧健者鑽謀不遂復起爭端曰今既增之某處明當增之某處不可不預爲道破也臣等忠心有餘智慮短淺不知可否伏祈聖明裁定如以爲可勅下臣部施行刊入職掌永爲遵守臣等不勝惓惓待命之至

勞臣軍功疏

奏爲勞臣軍功已覈聖主恩卹未沾合詞控陳伏祈天鑒事臣等竊聞古者明王之使臣有殫心竭力盡忠以報國者生則迪簡而委任之歿則追命而閔卹之此國家之彝典也彝也者常也言其必不可廢也廢之則爲缺事臣鄉致仕太子太保吏部尙書梁夢龍於萬曆三十年正月初一日病故本年二月內該保定巡撫汪應蛟巡按楊宏科會題一代巖瞻三朝耆宿膚功懋著邊陲勇退遂高林壑生前旣負完節身後合被榮施所有應得卹典相應照例查給等因奉旨下部具覆間輔臣沈鯉以爲宜有適值科臣錢夢皋疏論沈鯉波及夢龍遂致停閣嗣後議論涇難公道晦蝕以至天啓元年夢龍之子錦衣衛管衛事今在籍都指揮同知梁慈將其父生平履歷軍功備陳哀籲於聖主之前隨蒙聖旨下部該部業將夢龍前後官蹟軍功一一再覈明實以俟部覆適遇禮臣攝署復爾再遲夢龍繇嘉靖三十二年進士選庶吉士歷左右都給事中以至兵部侍郎所至皆著功勤有名迹不敢預述以煩聖覽其掌銓之日淺未得有所建立至其爲薊遼總督四年本兵調度二年所立首功數至五千所修臺牆數幾百里軍功彰著在人

耳目又係奉旨準致仕馳驛回籍身後應有卹典於見行條例允合而部覆之耽延至今者其說無他止謂其爲江陵舊相之門生耳舊相已經籍沒出其門下者悉遭累害今公論昭明共稱其功在社稷補給卹典矣况其門生乎且夢龍當舊相柄政時實未嘗附會行一敝法未嘗詭隨傷一善類今在朝諸臣多有知者彼沈鯉汪應蛟皆正人豈阿私者哉凡事相形則易見今天下東見侵擾南受陵辱事煩政重民窮盜起皇上宵衣旰食求一籌邊任事之臣而不易得則皇祖初年中國乂安四夷賓服謂非其時仗鉞筦樞之臣竭忠宣力之效不可也皇上孝思純篤有臣功在皇祖而忍令其窀穸之事與士庶無異乎近奉嚴旨子孫不準紛紛陳乞夢龍係一品大臣軍功懋著準致仕馳驛回籍有功無罪身後應得卹典非希覬望外者比而先經撫按題請慈於龍飛首歲上疏奉旨下部該部覆查履歷軍功皆已明確尤非遠年混擾者比伏乞天恩勅下吏禮二部卽爲照例查覆特加優卹臣等真知夢龍在國則爲忠臣居鄉則爲善人今其子孫如梁慈輩皆孝謹有萬石之風而慈以父忠未白鬱抑致疾遺榮里居臣等甚憐其志用是爲之合詞以請倘蒙俯鑒臣等之非私特準補給使天下萬世知聖主卽天也善人必爲天道所與忠臣必爲聖主所念其於勸臣厲世所裨益豈淺鮮哉臣等不勝仰企翹望之至

司官不肯爲用疏

奏爲司官不肯爲用請旨詰責以尊朝廷事臣聞孔子以冢宰爲成道之官其說在答魯公之間政也曰

人道敏政言用得其人則人道成矣而後可以立政然必自處以道而後能用人臣自入部見司官多缺有敬陳銓政變通之宜一疏欲就近推補不拘資序及一處不妨二人引他部郎中陸光祖等之調吏部及呂坤黃克念等之同邑同僚於二月二十日上疏已奉旨允行矣蓋臣聞兵部職方司郎中鄒維連之清方敢任久矣欲用之於考功以管外察而吳羽文之賢臣復不能舍也是以預爲之地及維連用而羽文杜門求去臣不得已而上典銓不能用人之疏以二臣應否遵旨到任爲請節奉聖旨鄒維連吳羽文既說皆賢且奉旨點用著卽到任供職不得引避欽此於是維連遂入稽勳司臣意羽文可以無去矣而求去益力及調維連爲考功司郎中而維連上疏力辭奉聖旨鄒維連照舊供職小臣不得瀆陳該部還嚴行申飭欽此臣意維連可以供職矣而杜門不出也臣不得已而上疏議增司屬一員亦奉聖旨依議行矣臣意二臣皆可以無去矣而聞其相繼出城以示決去之意臣於是乎絕望於二臣矣夫臣之所爲非創行也然必預請旨而後行之二臣不遵也又爲至再至三請旨留之臣遭際聖明擢至今官用賢乃其專責而乃一一瀟瀟宸嚴臣實自厭其瑣碎自愧其罷輟夙夜戰慄幸蒙皇上鑒臣愚忠咸得俞旨而二臣竟不遵也且用一維連而併逐羽文用一考功而併失職方欲拔茅而連茹乃刈葵而傷根豈不痛哉維連之疏自謂君恩未報慙負天地而又恐孤心無解於人言是甯負君恩負天地而必欲求解於人言也豈不異哉夫天子之命父母不敢抗也父母之令朋友不能阻也二臣遇聖天子拔置榮要其父母

甯敢令之辭避乎。非惟不敢令之辭避而已。亦必幸其子之才而得志也。豈可畏朋友而忘順親乎。二臣之自處。幾不以道矣。此通蔽之相妨也。所最可駭者。引章惇之攻蘇軾。蔡京之錮司馬光等。以爲喻。以致同鄉疑恨。各出私揭。嗤弄污詬。違明禁而不顧。遠近喧傳。以爲怪事。且人臣求去。自宜候旨。何乃輒自出城。臣苦留之。而曰。不出城。則人以爲戀戀一官也。夫明時可戀。豈爲一官哉。二臣畏人言而背明旨。欲潔身而忘大義。法宜叅處。但二臣自以爲人所逐。如拔眼中之釘。必不得留。逢人空訴。而不以告君父。不宜令之隱忍含糊以去。爲終身不平之恨。千古不決之疑。非成道之謂也。伏祈勅下二臣。詰責何以不遵明旨。當英賢濟濟之時。誰爲章惇。誰爲蔡京。明白具奏。以候聖明裁奪。臣不勝愧赧慄息之至。

衰病不能供職疏

奏爲衰病不能供職。懇祈聖慈。允放事。今年二月初十日。臣上疏言。臣年七十有五。老矣。稍稍勞苦。則病。恐廢職業。於禮當去。旋蒙聖旨溫留。臣卽出謝恩視事。迨至三月。推陞大選教職。四月。卽推陞有司。及急選。大選。考覈。給繇。各官擬定官銜。圖撥吏役諸事。湊乎一時。執簿查點。手書姓名。凡二千餘人。勞苦太過。至二十五日事竣。而臣遂病。頭目昏暈。飲食嘔吐。舊有腹痛之疾。遇寒輒發。今當盛暑。尙著春衣。動卽流汗。風來感之。冷浸肌骨。輒復作痛。得熱藥而愈。又成祕結。衰殘至此。王喬徒有丹訣。扁鵲亦爲庸醫。先是擬以二十七日考試聽選監生。而臣先一日註籍。今且半月矣。四海九州之人。集於闕下。冀得一官。貧乏

者甚多。以臣杜門。選授無時。萬人嗟怨。臣心如何自安。今部中之事。必不容緩者。皆於私寓僉押用印。臣昏憊日甚。已不能理。至於會推大僚。必不能出。雖欲勉修職業。以報聖恩。而氣力已竭。無可如何。謹再疏求去。伏祈慈允。如以臣忝爲大臣。不忍遽放。所有印務。祈命侍郎署掌。以待新冢臣。庶免曠官。得以無罪而去。臣力疾陳詞。中情悲慘。伏惟皇上憐之。

老病已不能留疏

奏爲老病已不能留。懇祈聖慈。先準辭印。以無妨部務事。臣比以老病。上疏求去。蒙聖旨。卿公忠任事。倚眷方殷。何遽稱疾言去。部務繁重。目前會推。選授等事。更難稽緩。卽出料理。慎勿再陳。該部知道。欽此。臣卽設香案。扶曳叩頭謝恩。復莊誦聖旨。感激流涕。至蒙任事之褒。臣迂滯懦弱。而叨掌邦治。所謂統百官均四海者也。今百官何如。四海何如。念之卽當愧死。不必更言老病矣。臣自壬戌蒙恩陞太常寺卿及工部侍郎。皆以老病疏辭。其時七十三也。未蒙俞允。臣不敢固辭。乃濯纓佩環而來。非不老不病也。今七十五矣。年則益老。而加之以勞苦。安得不病。臣雖忝列衣冠。而天性朴陋。猶田野之人也。不能爲巧言飾詞。未老決不言老。未病決不言病。但能任事。決不言不能。今則真老真病矣。食粟飲水。皆屬勉強。安能任事。卽如考試監生一事。臣腹痛恆不可忍。頭昏便很僵仆。安能守之竟日。籌燈閱卷。面定其職銜。三四鼓乃已於事而竣乎。諸臣多勸臣留者。壯健之人。固不知老者之苦也。臣少年食人一飯。至今不忘。豈其能忘

聖恩但筋力已盡。欲圖報而不能。真無如之何耳。銓部之進退人材。乃士風清濁民生休戚之所關。不容一日停閣。今臣之杜門二十餘日。停閣甚多矣。祈皇上命侍郎李騰芳署掌印務。料理會推等事。臣雖不能留。然可以不誤皇上之事。庶幾無罪。臣非求安逸也。自古忠臣孝子。未有不勞苦者也。惟至於年老。不能勞苦。乃不得已而安逸耳。故聖王制禮。人臣七十而致仕。苟非稟賦特異。老而益壯者。不忍強留。乃敬之也。非棄之也。伏願皇上行古聖王之道。使臣以禮而去。偷閒習靜。蛙消禽戲。以終天年。臣不勝悲鳴懇籲之至。

言官阻抑用賢疏

奏爲言官阻抑用賢。甚可駭異。不得已而籲天以據孤憤事。臣比者以老病再疏求去。原非假託。老病之人。旣無好懷。而加之以畏人歎世。憂毒熏心。自不難於立枯。豈復有富貴功名之念哉。此臣之所以求去也。奉聖旨。銓衡重任。卿秉公用人。朕所深鑒。方望定力主持。何乃引疾謙退。部務繁重。著該司官敦催。卽出視事。用副倚任至意。該部知道。欽此。臣不敢再辭。卽謝恩進部。然惶恐殊甚。臣之用人。萬萬不敢徇私。第衰年繇力。身在風波震撼之中。不能自立。安能主持。用以副皇上委任之至意乎。臣自入朝。卽聞鄒維連之清方有爲。繇兵部而調之吏部。苦心費詞。已見於前疏矣。維連。江西人也。江西道學節義之區。臣意其同鄉必彈冠相慶也。而給事中傅櫬。陳良訓等。譙詬週之。必欲其去。已不可曉矣。賴其鄉之先進。委曲

構解。維連乃到稽勳司任。臣大喜自此無譁矣。及調考功司。而譁更甚。傳檄遂上疏。叅僉都御史左光斗。及吏科都給事中魏大中。以爲邪臣。此二臣非碌碌者也。人皆知之。無庸臣之稱譽也。而又波及汪文言。嗟乎過矣。及御史袁化中等之疏出。而是非已明。維連擬以五月初九日到考功司任。臣益大喜。而先一日有御史張訥之疏。曰。躍冶之銓郎。數煩巽命之招呼。夫維連之到任。繇臣請旨督趣。不敢不從。何謂躍冶。招呼乃鴻臚寺之事。以聖旨爲招呼。出於何典。此疏出而維連遂不敢到任。草一辯疏求去。臣又以抗旨責之。改於十五日到任。其所覆諸疏。折衷極其明允。而立意主於寬厚。臣益大喜。幾失此人。而陳良訓條陳錢糧。言及人情奔競。賄賂公行。每一番計典。必有一番營求。及髡鉗亡命。毀譽摩牙等語。維連疑其誚已也。而又向臣求去。臣諭止之。以爲此時人情。原自奔競。譬如淫風流行之時。豈無靜女。何忍以刺淫之詩。爲己而作也。然考功司管計者也。而又當大闢之後。安得無疑。今外有強敵。內多賊民。海宇騷離。可謂無象之亂矣。爲臣子者。宜念皇上之憂辱。同心戮力。共濟時艱。惟日不足。臣自三月初五日。調用維連。今八十餘日矣。而舌戰未已。是無時而已也。畏人歎世之不暇。而何暇營職。且自此甯復敢用一人乎。且維連而果邪人耶。臣之用維連。而果以賄以暱耶。或左魏二臣而有私於維連耶。則宜指實明叅之。今明知維連之賢也。其進非繇邪徑也。而但隱語嫚罵。使之一日不得安其位。臣亦何能自安。每相對黯然無色。好是正直。而思自塵之憂。升於天階。而有窮塗之哭。豈不苦哉。臣以用賢之故。而累及於正臣。殃及於

無辜舉國不平。而臣靜默以待風波之定。至今八十餘日。不爲不久矣。事繇臣起。又何所待而不言乎。將待左光斗之去而後言耶。臣老矣。光斗等皆壯年。正宜力之時。無可去之理。臣自無可終默之理。況事起於臣。臣亦何敢無言。輒以愾億之愆。直陳於君父之前。萬不得已。更煩天語訓迪諸臣。偕於大道。左光斗、魏大中、鄒維連、勿萌去志。共襄計典。臣迂闊多事。瀾瀾宸嚴。至於再四。自知無益於時。徒使庶官不和。非惟老病而已。臣自此不復有言矣。伏惟聖明察之。

老病必不能留疏

奏爲老病必不能留。再辭印務。懇祈天慈。矜允早放事。臣屢疏求去。非有他故也。不過以老病日甚而已。老者數之將盡也。病者生之阨危也。臣今兼之。此不待言而當去者也。蒙皇上再三留之。臣氣力獨竭。暫寄人間。已成無用之物矣。卽部考監生。當在四月二十五日大選以前。因文選司人少事繁。改於二十七日。而臣二十六日病不能出。今且六月矣。選人多貧者。凶年粟貴。不無餓殍。卽不貧。離鄉遠客。冀得一官。而杳無試期。以臣之杜門。而使多人困苦。臣則不祥之人也。其他部務之停閣。不知其幾矣。念之憂心若春。臣老而加之以病。是秋葉將落而過之以風也。而又加之以廢事溺職之憂。是申之以霜也。皇上之留臣。非爲無益。恐爲王舜鼎等之續。皇上或亦悔其放之不早耳。吏部進退人材。如人之呼吸。稍停便成結脈。伏祈皇上卽命侍郎陳于廷。署掌印務。臣得稍安於心。以苟延旦夕。而遂首邱之願。臣千言萬語。不過

如此。皇上留臣。而臣已老已病。自恨福薄命蹇。不足以當殊遇。仰負聖恩。俯違夙心。臨疏鳴咽。更復何言。
老病已不能留疏

奏爲老病已不能留。三懇聖慈。準辭印務事。臣昨蒙皇上以久旱得雨。遣臣致祭社稷。五鼓詣壇。選人擁集於門。問臣進部否。旣而見其仍回私寓也。曰。我輩離家守候久矣。有典盡衣物者。有竟日不食者。有鬱鬱而歿者。不知何時乃得一官半職。彼卽知臣之老病。無所怨恨。臣頑非木石。很非豺狼。豈能不動心乎。臣若力能進部。何苦作此頑很之事。臣之杜門求去。遵旨而出也。屢矣。蓋以自試其精力。而困憊不可支持。輒復杜門。至昨祭社稷而還。頭昏腹痛。幾於斷絕。如此之人。豈可作官。而况任重典劇乎。今大選已迫矣。推陞急選已太遲矣。臣以婦人之仁。念多人之苦。當食而歎。伏枕而泣。臣非敢求安逸也。而力不能勞苦矣。天不能使臣復壯。奈之何哉。臣力疾望闕叩頭。祈垂惻怛。立命侍郎陳于廷。署印理事。以卹衰病之臣。以活困窮之士。此卽如大旱之得甘雨也。臣幸甚。天下幸甚。

懇祈聖恩惜老臣之性命疏

奏爲懇祈聖恩惜老臣之性命。立賜生還。以無久妨銓政事。臣自四月二十六日註籍。屢疏求去。至於今兩月矣。先是臣於六月初十日上疏。十二日復蒙聖旨溫留。責以匪躬之誼。臣叩頭流涕。心肝摧剝。無何而聞聖心拂鬱。不敢具疏。竊念禽獸之類。亦皆有知。臣受皇上之恩。如天如地。欲報罔極。而不知匪躬之

誼。吏部之長。兩月杜門。百官四海之事。稽誤無限。人情愁怨。萬衆嗷嗷。而臣亦不知也。則是禽獸之不若也。臣七十五而始老。老已遲矣。元氣微弱。飲食起居。調攝無術。臟腑榮衛。處處痛楚。兼之心血耗盡。耳之所聞。目之所見。口之所言。旋即忘之。書之於紙。并所書而忘之。此與木偶無異。何匪躬之可言乎。是以古聖人之治天下。仕者年七十而願致仕。則聽之。誠爲其在世之日無多。令得安閒以遂餘齒。此體悉下情之至。所以勸忠也。且使其爲子者。盡愛日之養。免皁魚之恨。所以教孝也。臣之妻更老於臣。惟有一子。以諸生受恩蔭。頗通經書。見臣臥則呻吟。動則嗟嘆。日夕祝天保佑。願得早歸。今歲秋闈。已不願入。此亦甚可憐憫。伏祈皇上。即放臣歸。以印務命侍郎陳于廷署掌料理會推。及六月中推陞大選等事。至於御史楊建烈。議論日多之疏。奉旨下該部院會同九卿科道各官。從公叅看具奏。此事皆繇臣用一鄒維連。而遂及左光斗。魏大中等。其是非甚爲明白。人人知之。臣旣必不能出矣。聞左都御史孫瑋。有脾胃之疾。尙須醫藥。則叅看無人。使左光斗等。進退維谷。羨浮雲而慕高鳥。卽中書汪文言。輔臣之所題也。賢者多與之遊。無端而納之於黑獄之中。亦宜結正其事。以服人心。此皆釁從臣起。臣不敢昧心畏人而不言。均祈聖明裁奪施行。

籲天求去疏

奏爲籲天求去。以免無禮曠職之罪事。臣以老病求去。至於再四。聖旨留之。愈溫愈切。臣叩頭謝恩。初則

不勝感激。今則不勝恐懼。皇上隆禮大臣如此。臣乃抗違不出。是無禮也。無禮者誅。雖皇上憐其老而赦之。臣則有可誅之罪矣。夫皇上之留臣。豈以臣之情詞未懇切耶。臣固自知其行能乖劣。不堪統均之任。以此求去。則須懇切。乃七十五歲之老臣。如老牛之不可以耕。老馬之不可以駕。強而使之。立見其死耳。何必多言。臣素有寒疾。每冬輒苦腹痛。今無冬無夏。往時猶少。今晝夜常痛。其他苦楚。不可勝言。人生有老。自宜如此。非二豎之侵侮也。臣杜門六十餘日。何所不思。如精神力量。一毫可以勉出。何苦冒無禮之罪。臣非顧一己之性命而忘國家。第舍性命而無益於國家。不可以爲忠耳。昔齊臣陳不占。有義而怯。勉強赴戰。聞鐘鼓之聲而死。漢人劉向。作九歎。舉以爲譏。謂齊無人。而陳子不自量也。臣之自量審矣。不敢使後世謂聖朝無人。臣猶豫不去。部事愈益堆積。代之者雖不臥不休。亦不能辦。是又臣之罪也。皇上早放臣一日。則臣之罪一日而悉解。是王維所謂日比皇明猶自暗。天齊聖壽未爲多者也。如皇上以臣有罪。而賜之罷斥。使大小臣工。不敢無禮。不敢曠職。則更有益於國家。臣必無一毫之怨也。臣雀立而候恩命矣。

蒙恩再出力挽干進疏

奏爲蒙恩再出力挽干進之習。以救時危事。臣以老病求去。非容一毫虛假也。疏屢上。皇上屢留之。臣再有言。不過老病二字。惟有強出供職耳。臣之衰拙。當此事勢艱危。人情污險之時。如牽罷牛而行荆棘泥

淖之中亦苦極矣。不得復有所隱而不言。今之士人以官爵爲性命。以鑽刺爲風俗。以賄賂爲交際。以囑託爲當然。以徇情爲盛德。以請教爲謙厚。聞司官署選者。每遇朝退三五爲輩。如牆而遮留之。講陞講調。講地方。講起用。既唯阿矣。則又有遮留者。恆至噬乾舌。敵而後脫。比至署中。則以私書至。其三五連名作書者。謂之公書。閭戶盈几。占對不暇。蟠木而藉先容。積薪而欲居上。不從則又爲書切責之。以爲違公論。必如所求而後已。然則必欲司官力拄之乎。臣皇上之大臣也。又老臣也。今之強有力者。不貴貴。不長長。臣以阻抑用賢之故。纔一分別是非。而惡聲已至。區區司官。彼視之猶雞肋也。曾不能當其一指之彈。而望其不畏強禦。良亦難矣。臣嘗論之。萬厯年間。近於以強凌弱。此時之人。近於以衆暴寡。力可弄權。人人皆爲吏部。財能買爵。處處俱是傍門。面皮世界。書帕長安。兩淮運判。周士顯。居官殊多穢德。久不齒於士林。立論故爲放言。大得罪於名教。去年鑽陞南兵部主事。臣入部之始。已塗抹其文憑。近日太康知縣李之茂。資俸已深。既稱母病。得陞禮部主事矣。俄而悔之。託人以百金饋臣。仍欲考選。士風如此。公道業已滅絕。苟非天骨清挺之士。鮮不剝民之脂膏。以求華臚。民安得不困窮而作亂。此劉宗周所以恥之。厭之恨之。而不肯一日留之。臣乃以老病不去。若士人之良心不萌。積習不改。外察伊邇。大貪大酷。皆以書帕獲免。如汪心淵之事。不肖者受賄而曲庇。賢者聞聲而附和。雖使臣有返老還童之術。與執簿呼名之吏無異。適足以敗其平生。而無寸補於國家。旋當以惡聲去耳。夫今之吏部。如久閉之宅。牆垣頓擗。蔓草滿

地徐徐掃除。當自門庭始。而慎選守舍之人。而杜干進。戒徇私是也。夫諸人之所口手而求者。大半爲其鄉里耳。或其同年故舊。要之不過兩京十三省之人。臣請發單於司官。各與其鄉之在朝者。詳加品覈。內而京堂。外而兩司。可爲卿貳者。可爲腹邊巡撫者。部屬之中。可爲腹邊司道者。可爲太守者。可爲提學者。推官知縣。可行取者。可吏部者。林下可起用者。俱一一言其居家之行誼。蒞官之建明。各造一冊。其所知他省直之官。另爲一冊。送之於臣。旬日之內。而四海之人才。盡在目中。朝退可以無言。公書可以不作。什塗無搶攘之醜聲。文部免奴僕之賤役。臣苦老病。不能吐哺求賢。賴此可免讐曠。司官卽爲舉主。必不漫漫而已。倘所謂濁者清之路。昏久得昭明乎。是未可知也。如曲從請託。不以告臣。俸淺而遽躡轉。望輕而擬超擢。卽行叅處。此等事前。臣陸光祖饒爲之。如臣孱劣。必得明旨而後。或可禁也。至於周士顯。罷有餘辜。李之茂。似宜改南京別部。以示小懲。臣以今日謝恩入部矣。臣之前疏。惟願皇上允放。是以有所未敢盡言。臣每早起趨朝。卽竟日昏眩。不能飲食。今六月推陞大選等事。改於七月矣。八月復當大選。九月大選教職。十月復當大選。年內兩月。外察期迫。無復須臾之間。恐力不能支。竊欲皇上免臣三六九之朝。遇大禮大慶。及說選承旨之類。乃入班行。敢昧死以請。臣不勝戰慄之至。

衰殘已不能留疏

奏爲衰殘已不能留。祈賜歸骸。以少存廉恥事。臣自七十三歲。蒙皇上起之田間。而爲太常卿。工部侍郎。

臣素有腹痛頭暈之疾。再疏控辭。未蒙俞允。臣感激聖恩。冒昧就列。今七十有五年。愈老而疾益深矣。四月間。杜門兩月餘。屢疏求去。蒙皇上屢留之。臣復冒昧入部。今日趨侍經筵。禮畢叩頭。不覺傾跌失容。踉蹌而出。臣不勝惶恐。竊念臣受皇上知遇之隆。千載罕值。徒有報稱之心。而精力已竭。皇上親見其衰劣。不能成禮。必蒙允放。無俟多言。惟願皇上立從所請。無以大臣之體貌而稍斬之。使部事堆積。多官鬱怨。臣旦夕行矣。不敢復任其責矣。一觀聖顏。遂成永絕。臣不勝哽塞懇望之至。

鼓舞士氣安民生疏

奏爲鼓舞士氣。以維世道安民生事。臣惟自古帝王所與共守國家者。民也。所與共安小民者。士也。公卿大夫。皆出於士。士之所以爲士者。有士氣也。士氣者。剛也正也。正而後剛。剛而後能久行其正。二者皆陽氣也。人無此氣。則爲鬼。故虞廷正官。黜陟幽明。幽也者。言其爲鬼也。古諺曰。人不衣食。君臣道息。此疾俗之言也。人以衣食之計。乃仕而求富貴。業已不正。夫焉得剛。爲仕者皆邪靡。皆爲富貴衣食。誰能爲國家安小民者。故鼓舞士氣。治天下之要道也。夫小民之氣。亦不可摧折也。摧折之。則良民僵而亂民橫。況於士乎。鼓舞士氣之道。在教之以重廉恥而輕富貴。重廉恥而輕富貴。則可殺而不可辱。乃可以爲士。乃可以爲公卿大夫。而與之共安小民。若使庸鄙之人。以其邪靡而得富貴。據權勢。則邪靡化而爲輕薄。不難侮大臣。害耆德。而況於卑弱小吏乎。臣屢言士大夫之躁競。備極形容。自知非長厚之道。誠見士習之極。

壤而願皇上教之以重廉恥也。邇來漸有清明之象矣。惟是事有關於士氣民生甚切。而人視之以爲緩。甚爲易行。而舉世不肯行者。臺臣魏光緒所條陳正塗佐領非禮稱呼之禁是也。向來府衛州縣佐貳首領見通判以上。皆稱老爺。與奴僕無異。臣所記憶萬歷年間。濟南歲貢王之翰。選爲主簿。見上官一呼老爺。遽感心疾。見人輒曰。孝子慈孫。百世不能改也。竟死。有志之士。每多如此。趙州選貢宋宏業。選州同知。上疏求與州縣正官俱稱上官。爲老大人。奉旨下部覆準通行矣。宏業見巡撫。遂稱老大人。巡撫怒而笞之十五。憤恚而疾以死。今臺臣之疏。臣雖移咨都察院通行申飭。上官必不肯行。佐領等官。誰肯以其性命捋虎鬚者乎。今佐領官所在。貪肆害民。正官有缺。必令署事。入門卽征租稅。以圖加收。日夜敲扑。急於星火。俗言署印如打劫。非虛語也。夫潔己愛民者。士君子之行也。上官以奴僕待之。而彼亦甘心爲奴僕。乃以士君子之行望之。豈可得乎。公卿大夫。皆與歲貢從芹泮起家者也。命運有利有不利耳。卽粟監起家太學。其中不乏才士。何忍凌辱之如此。壞士風而害小民。可勝道哉。臣願皇上敕下都察院再行申飭。勿復以明旨爲虛喝。爲上官者。釋大易謙光之旨。守尙書狎侮之戒。待鄉貢若甲科。待佐領若鄉貢。粟監之官。亦不得同於吏胥。吏胥之中。有卓然自立者。卽以正塗之禮禮之。昔陸光祖掌銓。曾陞趙蛟。楊果。爲知縣矣。用人豈可以資格拘哉。如此。將人人感奮。潔己愛民。而猶有貪肆害民者。非人類也。宜卽驅逐之。甚者提問追賊。不必留之。以待部中劣轉。使久爲民害也。臣因是而歎天下鮮雅達之人也。今方用武之

時而文吏之尊大益甚。大將受制於道府。指揮而下。皆奴僕也。而奔走如風。應答如雷。其態更醜。此舉世所以鮮將才。而遼左所以無軍功也。有封疆之責者。何可不思所以舞鼓之乎。臣不必越俎而多談也。伏祈聖明鑒察。如以爲可。容臣通行各撫按。刊刻書冊。徧發府州縣。永久遵行。

年老智昏認罪求去疏

奏爲年老智昏。認罪求去。叩懇聖慈憐憫事。昨以會推山西巡撫謝應祥。爲御史陳九疇所叅。文選司員外夏嘉遇。與九疇互相奏辨。奉旨。部院看議。臣會同左都御史高攀龍等看議。臣實主稿。言陳九疇之非。是而無所處分。奉聖旨。陳九疇所叅論謝應祥。於魏大中有師生之雅。紊亂朝政。事屬自欺。且去輔前以門牆招議。今魏大中欺朕冲幼。把持會推。敢以朝廷封疆。爲師報德。好生恣肆可惡。及夏嘉遇。陳九疇。奏揭紛囂。互相攻訐。成何政體。本當重處。姑從輕。魏大中。夏嘉遇。陳九疇。各降三級。俱調外任用。你每部院大臣。奉旨看議。何必含糊偏比。委曲調停。以後還著遵奉新諭。一體申飭行。如有仍蹈前轍。朋謀結黨。淆亂國是的一併重處。該部院知道。欽此。臣讀之不勝愧恥。不勝恐懼。自惟老耄。以至於此。曩者臣之所以力求解免。誠自知之審也。夫智者。血氣之榮也。血氣旣衰。則智慮自短。臣本愚人。老而倔強。其見未必真。而恆自信。其知人亦未必真。而恆信人。不爲羣議所奪。頃山西巡撫員缺。多爲郭尙友求之者。臣聞其厚饋前科臣。卻之而又至。故不敢推。而信謝應祥之沈靜。可以有爲。特與員外夏嘉遇言而推之。絕未與魏

大中言也。然大中之峻潔，必不行私。嘉遇之忠耿，必不可私干。臣夢寐亦信之，而惟以陳九疇爲非是。第以言官非可輕處。先年房寰之論海瑞，亦未嘗處也。竟姑置之。聖旨謂臣含糊調停。此臣之罪也。雖百喙無以自解矣。至於朋謀結黨，此智者之所能，非臣之所能也。夫結黨者必欲其衆，而臣之所取者皆單子。違衆之人，此樹敵之道。安能結黨。臣血氣日衰於一日，智識日昏於一日。曩者求去如蒙皇上允放，則無今日之謬誤。若濡需不去，恐得罪益甚。有負皇上之恩禮，非所以重朝廷。光史冊也。伏惟皇上憐其老，矜其愚，寬斧鉞之誅，立賜允放。豈惟臣免於辱，殆亦可以息讜譁而全國體。臣不勝呼天祝願之至。

辭朝疏

奏爲辭朝事。臣以老病，屢疏求歸。近日精力極衰，病苦極甚，昏憤遺忘，言動多妄，亦自厭其陳人矣。伏蒙聖恩，準臣回籍調理。臣服官二載，悖謬多端，皇上念其篤老，憐其無知，不治其罪，俾得遂其首邱之願。臣病久無力，慮恐傾跌，不能趨朝，謹令家人扶曳於大明門外叩頭上疏辭朝。卽日行矣。翹望闕廷，涕泗交流，感激天恩，莫知所報。惟日夜祝我皇上聖壽與皇圖俱萬萬年。臣無任瞻依吧優之至。

